

2 PITA

Rau Yo Pita Iwode I, In Ru Ki

1 ¹Au, Simon Pita i, ayei urata ben kapraingi inbe aposol ke Yesu Kirisi. Au i awodo rau naii pang ang di tooltool yo katara lomim medana pang Yesu Kirisi dawa ben am nga. Ngan ya in Maro kiidi, inbe ya in tool tani yo ikau idi a ipamulidi ye so dook tiap yo be igarungidi i, inbe ya in itoo dada dook mata yo noonoonoo nga. Le ye dada dook mata ki tani, in ilonidi a nen ngan tatara lodo medana panga.

²Ngan ang ngan lomim galanga moolmool ye Maro inbe Tool Mai kiidi yo Yesu Kirisi i. Nen le apatarau pang Maro nen, be lo galanga kiang tani in ole iso dada pang a be nen ngan iyei dada dook mata pang, inbe ikaua lo silene ki pang mai le mai san.

Noonongoo Pang Di Tooltool Ke Maro Ye Dada Dook Mata Yo Be Titoo I

³Ngan ye yo lod galanga ye moolmool nga, ngan le ikap so le imot yo tamaka ye ngan paidi, a be nen ngan tayepe dook, inbe tatoo dada dook mata le imot yo lono be tatoo nga. Nen le ikap so nen paidi ye gurana ki yo mai i. Ya in itoo dada yo dook mata in leu, inbe ene mai san ke be di tooltool tipayiti ye. Ngan nen le ipootidi panga ya taunu be taye ben di tooltool ki. ⁴Moolmool, ya in itoo dada dook mata inbe gurana ki mai san. Ngan la le ipamede betanga be ole iyeie dada yo dook mata ki taunu i, in paidi, a be nen ngan dada dook tiap ke tana yo iyolidi be la taye noonoo nga, ngan o ke be igarungidi tiap, bong ole tatoo dada dook mata dawa ben yo itoo i.

⁵Ngan so dook mata tina ngan Maro iyei paidi oo, nen le dook mata be katara lomim medana panga leu be, bong be nen ngan kayei urata le guramim be katoo dada yo dook mata nga lapau. Ngan kumata le be katoo dada dook mata tani nga, ngan dook mata, bong ole lomim kaua urata dook ye dada moolmool yo ke Maro nga lapau. ⁶Inbe kumata le be lomim kaua urata dook ye dada moolmool tani nga, ngan dook

mata, bong ole kakap tutang ye yepongo kiang lapau. Inbe kumata le be kakaptutang ye yepongo kiang nga, ngan dook mata, bong ole kakodo le kamede inbe kasolo urata moonoo yo be pombe pang yang, ngan lapau. Inbe kumata le be kakodo le kamede nen nga, ngan dook mata, bong ole katoo dada dook mata le imot yo Maro lono be katoo ngan lapau. ⁷Inbe kumata le be katoo dada dook mata le imot yo Maro lono be katoo nga, ngan dook mata, bong ole lomim mai san pang di diemim yo titara lodi medana pang Kirisi ngan lapau. Inbe kumata le be lomim mai san pang di diemim nga, ngan dook mata, bong be nen ngan ole kayei dada dook mata yo be lomim mai san pang di tooltool nga le imot ngan lapau. ⁸Ngan kumata le be tasudungu toongoo dada dook mata tina ngan le ikenen leu nga, ngan ole ipaposidi ben idi nga lod galanga moolmool ye Tool Mai kiidi Yesu Kirisi, inbe lo galanga kiidi tani in ole ilonidi le tayepe ye yepongo yo dook mata i. ⁹Bong kumata be tool sa itoo dada tina ngan tiap nga, ngan ya in dawa ben tool mata kis yo ikamata ni tiap i. Inbe ya in lon kalli ye yo Maro ipamule a igiri dada dook tiap ki ke noonoo yo muku ngan iyei nga.

¹⁰Le ang di diek nga, ngan ole kakaua urata le guramim be katoo dada tina ngan dook le imot, a be nen ngan ipaposang ben moolmool ang ngan Maro iku ang, inbe ipootang panga ya taunu. Ngan ye yo awete nen nga, yesoo kumata le be kayei so tina nga, ngan o ke be kawala murimim pang Maro pitiap yege. ¹¹Inbe Maro ole lon ponana pang a iso dada pang be lo kayepe so ye malala ki. Ngan malala ki tani, in Tool Mai kiidi Yesu Kirisi yo ipamulidi ye so dook tiap yo be igarungidi i, in iyepe ye. Inbe ya la be matan kala so ki nga le imot le taukan motingi i.

Pita Be Ipamadit Di Tooltool Lodi Mulu

¹²Ang ngan o lomim galanga ye so yo awetewete ye, ngan oo. Inbe kaparama betanga moolmool ke Kirisi yo di tooltool tipatomonai ang ye, in oo. Bong au i lok be apamadit lomim ye so tina ngan le ikenen leu. ¹³⁻¹⁴Ngan au tinik i dawa ben para ke kaningi yo iken le mos tiap be dook tiap i. Inbe Tool Mai kiidi Yesu Kirisi ipagalanga lok nen, be ole palbe leu inbe ayege tana i a alo. Le nookoot nga ye kene yo ayepe matak rerene go nga, ngan dook mata nen be awetewete pang a apamadit lomim mulu ye so tina nga, a be nen ngan lomim kalli be. ¹⁵Ngan la le nookoot nga akaua urata le gurak be awete pang ye so tina nga, a ye kene yo be amata ye in nga, ngan ole lomim tut so tina mulu le iken so yang.

Pita Ya Taunu Ikamata Maro Nunngana Yo Iduku Yesu I

¹⁶Muku ngan amwete pang ye Tool Mai kiidi Yesu Kirisi yo be imulu a isi ngan ipa ye gurana ki maiyoko in oo. Ngan ye kene tani ngan amtoo gasagasanga sokorai sa kidi tooltool yo ipa ye di tapdi lodi la le amwete

pang ye, ngan tiap. Bong ye am tapmam matamam, ngan amkamata ben ya in tool ene mai ki taunu, inbe gurana ki maiyoko, ngan la le awete pang ye nga. ¹⁷⁻¹⁸Le moolmool, yesoo ye kene yo Tamada Maro iyitmaka ene inbe iyeie ene le ilo ete ke be di tooltool tipayiti ye in nga, ngan amyepe lapau. Le ye kene tani in amye Kirisi amyepe ye kawal mison ke Maro, inbe Maro nunngana iduku, inbe kalngana si iwetewete ye i. Le tina am tapmam amlongo Maro kalngana ipa ye malala ki a si iwetewete ye nen, “Tool in au Natuk. Au i lok panga mai san, inbe lok ponana ye.”^a

Betanga Yo Di Maro Koonoo Tiwodo Ngan Moolmool

¹⁹Ngan nen le am nga lomam galanga nen, betanga yo di Maro koonoo tikap a tiwodo ilo ye rau nga, ngan moolmool. Le kin katar talngamim a kalongo betanga kidi, yesoo betanga kidi tina ngan dawa ben sul yo nunngana ilangaraia ni todo lono i. Le kaparama betanga tina le ilo ye lal yo be Yesu imulu a isi pombe ye i. Ngan ye kene tani in ole pombe dawa ben malama yo perbe a boi ke muntu ise ngan le ilangaraia ni i. ²⁰Bong so maiyoko yo be lomim galanga ye in nen: Di Maro koonoo ngan sa yo be iwodo betanga ilo ye Rau ke Maro ye ya taunu lono, ngan tiap. ²¹Ngan ye yo awete nen nga, yesoo betanga yo di Maro koonoo tiwete nga, ngan ipa ye di tapdi lodi tiap, bong Maro Amunu Silene la ipamadit lodi be tiwete betanga tina yo Maro lono be tiwete nga.

Maro Ole Iyemenai Di Tooltool Ke Kaplungunu

2 ¹Ngan muku nga, ngan di tooltool ke kaplungunu yo tiwete be di ngan Maro koonoo nga, ngan tiyepe kataunu ye di tooltool ke Isrel. Le gaongo leu, di tooltool ke kaplungunu yo tipatomonai di tooltool ye betanga doko nga, ngan di la be se tiyepe kataunu kiang nga. Di ngan ole tiyei urata dook tiap kidi mallangana tiap, bong ole tiwete betanga kidi sollono, inbe tipatomonai di tooltool kiang ye so yo ke be igarung lodi nga. Di tooltool ke kaplungunu tina ngan ole tiwala muridi pang Tool Mai yo iyei tool kuto mai pang so nga le imot i. Moolmool, ole tiwala muridi pang Tool Mai yo iyimi di panga ya taunu i. Le ye dada kidi yo tiyei i, in di tapdi ole tiyolo pang di be igarung di palbe leu. ²Bong di tooltool alunu ole titoo patomonaingi kidi tooltool tina a tiyei dada dook tiap yo ke be moomoodoo ye nga. Inbe ye dada dook tiap kidi tina, ngan ole di tooltool kapala tikamata le tikan paseme dada moolmool ke Maro ye betanga dook tiap. ³Inbe di tooltool ke kaplungunu tina ngan matadi so, le ole tikaua lungunu yang ye betanga kidi yo ipa ye di tapdi lodi nga, a be nen ngan kakap pat le so pang di. Bong mukot yege ngan Maro lon kaua dada atu a iken in nen, be ole iyemenai di, le nga inam be iyei

^a 1:17-18 Matiu 17:5; Maka 9:7; Luka 9:35

leu. Ngan betanga yo be Maro igarung di ye i, in ya la ikenen go i le ole igarung di.

⁴Au i yo awete nen nga, yesoo muku ngan di bangabangana ke Maro pattu tikapsap ye dada ke noonoo, ngan le Maro ipatau di a sila tiyepe tiap. Bong ikatte di tidu ye gomo yo idu lopo mata le todo ki mai mata i. Le di nango la tiyepe ye ni dook tiap tani, inbe tinam ye lal yo be Maro iyemenai di ye i. ⁵Inbe di tooltool yo muku ngan tiyepe ye tana i, inbe titoo dada dook tiap le imot yo Maro lono be titoo tiap nga, ngan Maro ipatau di tiap lapau. Bong iyeie oongoo mai a pombe, ngan le igarung di le imot a tilledi. Bong Noa, tool tani yo iwetewete pang di tooltool be titoo dada dook mata noonoonoo ye Maro matana i, in la Maro iloni le ipa ye di tooltool limi be ru a tiyepe dook mata i. ⁶Inbe muku ngan Maro igarung malala maimai ru yo Sodom le Gomora nga, ngan idaun di a ei ikan di le kawa leu la iken nga. Ngan dada tani yo iyei nen i, in be nen a ipatnaii pang di tooltool nen, be ole iyemenai di tooltool le imot yo titoo dada dook tiap yo Maro lono be titoo tiap nga. ⁷Bong ye kene tani in Maro ilono Loto le so sa igarungu tiap. Ngan Loto tani in iyepe Sodom lapau, bong ya in tool dook mata noonoonoo. Inbe ya in ikamata ben di tooltool ke Sodom tisak noonoonoo, inbe tipas le tiyei urata dook tiap yo giri leu ye Maro matana nga, ngan le lon massingi ye. ⁸Moolmool, tool dook mata noonoonoo tani, in iyepe kataunu ke di tooltool ke Sodom, le ye ke kanakana ngan ikamata dada yo tipammoo ye nga, inbe ilongo betanga dook tiap kidi tina yo tiwete nga. Le tina lono yo iken noonoonoo dook mata i, in imassingi ye mai san. ⁹Le kakamata, di tooltool yo titoo dada dook mata yo Maro lono be titoo nga, ngan kumata be touanga sa pombe pang ye di nga, ngan Tool Mai Maro in lon galanga ye dada yo be ilon di ye i. E di tooltool yo noonoodi tiap nga, ngan ole ikap urata moonoo pang di le ke be tisur tiap. Nen le ole tiyetaia masngana nookoot nga le ilo ye lal yo be ikarata betanga kidi tooltool a be iyemenai di ye i. ¹⁰Le moolmool ole tisolo masngana, bong di tooltool ke kaplungunu tina yo lodi be tiyepe la gurana ke Maro parmana tiap le tisak noonoonoo inbe titoo di tapdi lodi a tiyei dada dook tiap yo giri leu ye Maro matana nga, ngan ole tisolo masngana mai le mai san.

Ngan di tooltool tina ngan di tapdi tiyitmak di, inbe titattadai ye soo so yo lodi be tiyei ngan tiap lapau. Ngan nen le titattadai be tiwete betanga dook tiap ye soo so yo Maro ikarata di a tiyepe ye malala ki nga. ¹¹Bong di bangabangana yo gurana kidi maimai le tillos di tooltool ke kaplungunu nga, ngan tiyei dada nen tiap. Le ye kene yo tikodo dama ke Tool Mai nga, ngan lodi be tiwete betanga dook tiap sa ye di tiap. ¹²Bong di tooltool ke kaplungunu tina, ngan tiwete betanga dook tiap ye so yo lodi galanga ye tiap nga. Le di ngan dawa ben di asara gok yo taukadi lo galanga nga. Ngan nen le tipas le tipa ye soo dada kidi yo lodi be tipa

ye nga. Di asara yo nen nga, ngan tipasui di be di tooltool tikap di a tiraumatamata di leu. Le dada gaongo leu, ole Maro igarung di dawa ben di tooltool tiraumatamata di asara nga.

¹³Di tooltool ke kaplungunu tina ngan tigarung di tooltool kapala lodi, le ye urata dook tiap kidi kootoonoo nga, ngan ole Maro igarung di le tisololo masngana mai. Di ngan lodi ponana ye dada dook tiap yo tiyei nga, le lodi be bong a tiko lo ngan be tiyei tiap, bong tiyei mallangana ye kemai leu. Nen le ye kene yo kaye di diemim kayei mailang a kakanen inbe kagauagaua lomim ye in nga, ngan tikan le tiyin kaiye mata le tina tigarung mailang kiang. Di ngan dawa ben so giri leu yo ipookoo sousoungu kiang ngan le igarungu a moomoomim ye i. ¹⁴Ngan di tooltool tina ngan timaryoo ye yeingi noonoo tiap, bong matadi iyei ye di garup a lodi kaua urata ye dada dook tiap ke bauk le ikenen leu. Inbe koodi paweserai di tooltool yo tikodo le timede ye Kirisi tiao nga, ngan be nen a tikap di la titoo dada dook tiap kidi. Inbe di ngan dada dook tiap yo ke matadi so in iso pang di. Bong Maro ikarata betanga a iken oo, be ole iyemenai di ye.

¹⁵Di tooltool ke kaplungunu tina ngan tiyege dada dook mata, inbe tipas a la titoo dada dook tiap gaongo leu ben ke Balam yo Beor natunu i. Ngan Balam tani in Maro koonoo atu, bong matana pat mai mata, le iyei dada dook tiap be ikap pat ye urata kootoonoo ki. ¹⁶Bong asara ki ke solanga di tooltool yo ene donki i, in iwete panga dawa ben tool iwetewete nga a ipasak panga ye dada dook tiap ki yo iyei i, inbe ilele be iyei kapakapa nen mulu be.

¹⁷Di tooltool ke kaplungunu tina ngan dawa ben ran gumono yo ran ki imaka a iwodowodo i. Inbe di ngan dawa ben eng tene yo muru mai iman ngan itiri a ila i. Ngan la Maro ikarata ni yo todo ki imukku mata in pang di a be tiyepe ye. ¹⁸Di ngan koodi payit di ye betebetanga kidi yo taukan kanono nga, inbe koodi paweserai di tooltool a be nen ngan tipamadit lodi be tiyei dada dook tiap ke bauk, le dada dook tiap matana matana kapala yo ke tana i nga. Ngan nen le di tooltool yo nookoot nga tiyege di tooltool ke yeingi noonoo a timan nga, ngan tiyolo di a la titoo di ye dada dook tiap kidi tina. ¹⁹Ngan di tooltool ke kaplungunu tina tiwete pang di nen, “Kumata le be katoo am nga, ngan so sa yo be igunkalang ngan tiap, le dook mata ke be kapas le katoo ang tapmim lomim leu.” Tiwete pang di nen, bong di tapdi tiyepe le dawa ben di tooltool yo tiyei urata ben di poranga nga, yesoo dada dook tiap yo tiyei nga, ngan iyei mai pang di le tiyepe parmana. Ngan nanga, kumata be tool atu imalum pang so sa be iyei kuto mai panga nga, ngan ya in ben poranga ki. ²⁰Muku ngan di tooltool ke kaplungunu tina ngan tiyege dada dook tiap ke tana yo be igarung di nga, inbe tiportak lodi pang Tool Mai kiidi Yesu Kirisi. Ngan nen le lodi galanga moolmool ye tool tani yo ikau idi a ipamulidi ye so

dook tiap yo be igarungidi i. Bong timulukala dada dook tiap mulu a la tiyepe dada dook tiap tina ngan parmana. Atoo, muku ngan ye kene yo titara lodi medana pang Yesu tiao nga, ngan Maro lono be igarung di le dook tiap mata tiap, bong yo nookoot nga tiwala muridi panga le ole igarung di le dook tiap le dook tiap ki taunu. ²¹Kumata be di tooltool lodi galanga tiap ye dada dook mata noonoonoo ke Maro nga, ngan o ke be tisolo urata moonoo mai mata tiap. Bong lodi galanga ye, lo ngan be tiwala muridi pang dada dook mata tani yo Maro ya taunu itaru a di tooltool tiwetewete pang di ye in nga, ngan la ole tisolo urata moonoo mai le mai ki taunu nga. ²²Ngan tiyei nen le itarke betanga ru. Betanga tina ngan atu in nen, “Gaunu ilulu, motong imulu la ikana luluana tani mulu.” Inbe betanga tina ngan san mulu in nen, “Ga irriu ye ran, motong imulu la iraua tingi.”

Lal Ke Tool Mai Yo Be Isi Ye I

3 ¹Di diek yo lok pang mai san nga, ngan i rau kiau ru ki yo awode pang in naii. Ngan rau ru tina yo awodo nga, ngan be apamadit lomim ye a be nen ngan ole lomim kaua urata dook ye dada moolmool yo ke Maro nga. ²Au i lok be lomim tut mulu ye betanga yo muku ngan di Maro koonoo tiwete nga. Di ngan Maro ipootoo di panga ya taunu, inbe tikaua koonoo a tiwete betanga ki paidi. Inbe au i lok be lomim tut ye betanga ke Tool Mai kiidi Yesu Kirisi. Ya in tool tani yo ikau idi a ipamulidi ye so dook tiap yo be igarungidi i. Inbe betanga ki tina, ngan di aposol ki tiwete pang a kalongo oo.

³Ngan so maiyoko yo be lomim galanga ye in nen: Nookoot nga le ilo ye lal yo be Yesu imulu a isi ye in nga, ngan di tooltool ke palenge sere ole pompombe a tingelera so ke Kirisi. Inbe ole titoo di tapdi lodi a tiyei dada dook tiap yo be lodi ponana ye nga. ⁴Ole tiwete nen, “Ai, Kirisi ipamede betanga be imulu a isi nga, ngan le isi lapau? Ngan mukot yege ye kene yo di tiudu timmata ye in le se nookoot katai nga, ngan so tina nga le imot ngan iken gaongo leu ben tina ye kene yo tana i pombe ye i.” ⁵⁻⁶Tiwete nen, bong kakamata, mukot yege ngan Maro iwete leu, inbe lang pombe. Inbe iyeie ran le idu pang lopo, inbe tana ise pombe ye ran a iken mallangana. Motong la ye kene san mulu ngan Maro iwete leu, inbe ki mai imol a isi le oongoo ki iduku tana mai i le imot a igarungu. Ngan di tooltool tina ngan lodi galanga ye so tina oo, bong lodi pang betanga yo nen ngan tiap. ⁷Inbe ye dada gaongo leu, Maro iwete be lang le tana yo nookoot katai iken nga, ngan be iken nen a inam ye ei yo be pombe a be nen ngan idaun di ye i. Le inam le ilo ye lal yo be ikarata betanga kidi tooltool ye i, ngan la be iyemenai di tooltool yo tiwala muridi pang dada dook mata yo lono be titoo nga. Le ye kene tani in ole igarung lang le tana le ipa ye di tooltool tina yo dook tiap ngan lapau.

⁸Le di diek yo lok pang mai san nga, ngan be awete betanga atu pang a lomim kalli be. Tool Mai ikamata ke atu in dawa ben rai tau atu, inbe rai tau atu in ikamata ben ke atu. Le ye kamatanga ki ngan yaru nga gaongo leu. ⁹Ngan di tooltool kapala lodi tar nen be Tool Mai in itu le ke be iyeie betanga ki yo ipamede i, in le itara kanono tiap, bong tiap. Ngan ye punu yo a le katen malmal tarai pang ye tiap in nen. Ya lono be igarungu tool sa ye noonoo ki yo iyei ngan tiap, bong lono be di tooltool nga le imot tiportak lodi ye dada dook tiap kidi yo tiyei nga.

¹⁰Bong lal yo Tool Mai be imulu a isi ye i, in ole pombe dawa ben tool ke pinnau yo iyei urata ki sollono i, le ke be lomim galanga ye lal yo be pombe ye in tiap. Ngan ye lal tani in lang katene ole putumbe a ilene, inbe mununu ki mai ole ila ni mooloo san. Inbe so le imot yo iken lang katene nga, ngan ei ole ikan di le imot. Inbe ye lal tani in tana le so le imot yo iken ye nga, ngan ei ole ikan di le tilledi lapau.^b

¹¹Ngan nanga, kumata be so tina ngan le imot be tilledi ye dada yo nen in nga, ngan ang ngan lomim tar be ole katoo soo dada? Ngan dook mata nen, be ole kayepe dook mata le dawa ben di tooltool ke Maro yo ipootoo di panga nga, inbe katoo dada dook mata le imot yo Maro lono be katoo nga. ¹²Le nookoot ye kene yo kayepe a kanam ye lal yo Maro itaru be Kirisi imulu a isi ye in nga, ngan kakapye be kayei urata ke Maro a nen ngan lal tani in ole pombe palbe leu. Ngan ye lal tani in ole ei ikana lang a igarungu, inbe so le imot yo iken lang katene nga, ngan ole ei iyesnai di le tiyei ran koonoo. ¹³Bong idi nga lod tutu betanga yo Maro ipamede i. Ngan ya in iwete nen, be pang dama ni nga, ngan ole ikarata lang paunu inbe tana paunu ngan pang di tooltool yo noonoodi nga leu be tiyepe ye. Ngan la idi nga tatar matada ye so tina yo be pombe nga.

Takaptutidi Dook Inbe Tanama Tool Mai

¹⁴Nen le ang di tooltool kiau yo lok pang mai san nga, ye kene yo katar matamim a kanam ye so tina yo be pombe nga, ngan kakapye be kayepe le tinimim iken galangana dook mata, inbe kayepe le taukamim busunu ye Maro matana. Inbe kayepe le lo botoboto sa be iken kataunu kiang kaye ngan be, bong kaye kayepe ye lo silene dook mata. ¹⁵Le matamim too dook ngan. Ye punu yo Tool Mai katen malmal tarai pang di tooltool ye tiap in nen, be inam di be tiportak lodi a be nen ngan ikap di a ipamulu di ye so dook tiap yo be igarung di i. Ngan tool kiidi Paulu, yo lodo panga mai san i, in iwete betanga nen lapau. Ya in Maro ikap lo galanga dook mata panga a iwodo rau pang a iwete betanga gaongo leu

^b 3:10 Dada san yo be taportaka betanga i ye i, in nen: *Ngan ye lal tani in tana le so le imot yo iken ye nga, ngan Maro ole ipapos urata dook tiap kidi yo tiyei nga, a be nen ngan iyemenai di ye.*

ben tina yo nookoot ngan awete pang ye nga. ¹⁶Ngan ye rau ki tina le imot yo iwodo nga, ngan iwetewete ye so tina nga. Moolmool, so kapala yo iwodo ilo ye rau ki nga, ngan imoo le ke be lod galanga ye mata tiap. Ngan nanga, di tooltool yo lodi galanga tiap, inbe tikodo le timede ye Kirisi tiao nga, ngan tipagalanga betanga dook ye dadana tiap dawa ben tiyei ye betanga kapala yo iken ye Rau ke Maro nga. Le dada kidi yo tiyeii nen i, in di tapdi ole tiyolo pang di be Maro igarung di ye.

¹⁷Ang di tooltool kiau yo lok pang mai san nga, nookoot nga ang ngan lomim galanga ye so tina ngan oo. Le kin kakawai yang dook leu ye di tooltool ke sak noonongoo. Ole nen ngan tikaua lungunu yang, ngan ole kakodo le kamede ye lomim medana yo kataru in tiap. ¹⁸Bong kakapye be kattoo dada dook mata yo Tool Mai kiidi Yesu Kirisi be lon ponana ye nga, a be nen ngan iyei dada dook mata pang mai le mai san, inbe ilonang le lomim galanga ye le ikenen leu. Ya in tool ene mai san le tayitmak ene nookoot nga, inbe tayitmaka ene a ikenen nen a tala. Moolmool.